

Pa loke ta su caso contra di Booshi Wever

Rudy Lampe a hiba e caso na Corte Europeo

DIA 28 di september ultimo abogado di Rudy Lampe, mr. Spong, a entama e caso tocante inmunidad parlamentario na Strasburgo. Despues cu Rudy Lampe a perde e caso na Hoge Raad na juni ultimo, e a dicidi hunto cu su abogado mr. Spong di hiba e caso na Corte Europeo. Riba e potret por mira sr. Rudy Lampe hunto cu mr. Spong na su oficina na Amsterdam. Den e reunion aki na oficina di mr. Spong e decision a cay cu lo hiba e caso Corte Europeo. Mr. Spong tambe ta abogado den e caso contra sr. Geert Wilders, unda cu mr. Spong a dicidi tambe pa hiba e caso aki na Corte Europeo.

E dos casonan aki tin similitud. Den caso di Rudy Lampe, a pidi pa limita e inmunidad parlamentario den sala di Parlamento. Corte den Prome Instancia a duna Rudy Lampe razon, cu inmunidad parlamentario no por ta absoluto.

Pa tal motibo sr. Booshi Wever mester a rectificá den medionan di comunicacion su expresionnan haci den reunion publico di Parlamento cu sr. Rudy Lampe lo ta pedofiel.

Na Hof, Hueznán a dicta cu inmunidad parlamentario ta absoluto, cu aunke sr. Booshi Wever a comete e delito di difamacion den reunion public, pero dor cu e ta goza di inmunidad parlamentario e no por keda persogui p'esey. Hoge Raad finalmente a duna Hof razon, cu un Parlamentario of Minister por bisa kico cu e kier den Parlamento sin cu e por wordo persigui p'esaki.

Despues di e sentencia di Hoge Raad, sr. Booshi Wever pa medio di su abogadonan a menaza di pone beslag riba propiedadnan di sr. Rudy Lampe, ya cu e sentencia di Hof a dicta cu sr. Rudy Lampe mester paga e gastonan di rectificacion y di

abogado di sr. Booshi Wever.

Sr. Rudy Lampe a paga e suma di casi 6 mil florin na sr. Booshi Wever via oficina di abogado Croes, Wever & Tchong y asina a evita cu beslag lo keda poni riba propiedadnan di sr. Rudy Lampe. Esaki ta pa muestra pueblo e mentalidad di e Parlamentario independiente sr. Booshi Wever.

Den caso di Geert Wilders tabata tambe pa su ofensanan contra persona y gruponan pafo di Parlamento. Geert Wilders tambe a gana su caso un par di dia despues cu sr. Rudy Lampe a perde su caso.

E caso di Lampe tabata programa pa su sentencia a cay riba 2 di september 2011, pero pa razonnan inexplicabel Hoge Raad a dicidi di adelanta e sentencia riba 17 di juni, unda Hoge Raad

ta bay contra e argumento di sr. Rudy Lampe pa limita e inmunidad parlamentario.

Algun dia despues Geert Wilders ta gana su caso unda cu Hueznán ta bay mas leu y ta amplia e inmunidad parlamentario. Ta dicta cu un politico por bisa mas cos pafo di Parlamento cu un ciudadano comun y coriente. Kier men Geert Wilders por sigui ofende gruponan hasta pafo di Parlamento.

Awor abogado mr. Spong ta hiba e dos casonan aki Corte Europeo. E ta bay bira hopi interesante pa sa kico e Hueznán na Strasburgo ta bay dicidi tocante inmunidad

parlamentario.

Sr. Rudy Lampe ta haci e sacrificio financiero aki no pa su mes sino p'e futuro sistema politico, pasobra inmunidad no por kier men impunidad.

Si nos kier hisa e nivel di politica na Aruba y na otro pais mester limita e inmunidad parlamentario. E ta existi hopi gasto financiero pa sr. Rudy Lampe hiba e caso te na Corte Europeo, pero den bida mester sacrifica bo interes personal pa un bien comun.

